

Post Aruba N.V. ta dedica stampia na nos monumentonan

ORANJESTAD- Dia 16 di october 2015 Post Aruba N.V. a emití un serie nobo di stampia titula "Monumentonan di Aruba 2015". E serie ta consisti di 8 stampia di 175 cen, cu ta yega na un prijs total di Afl.14,00 y ta compaña pa su envelop di

promé dia di emision' cu ta costa Afl.17,00.

E diseñonan pa e stampianan aki ta un creacion di Elvis Tromp. E stampianan ta imprimi na e Imprenta Estatal Austriaco. E serie di stampia ta obtenibel na e diferente oficinanan di

Post Aruba, respectivamente na Oranjestad, San Nicolas, Sta. Cruz y Palm Beach Plaza Mall.

Pa mas informacion tocante e stampia "Monumentonan di Aruba 2015" por tuma contacto cu Departamento Filatelico di Post Aruba N.V., cu ta situa na

J.E. Irausquiplein 9, Oranjestad, cu su number di telefon 528-7678, of bishita su pagina di Facebook Aruba Stamps.

E bonita serie aki no por falta den bo coleccion. Busca esun di bo awe mes, ya cu e cantidad ta limita. Un monumento tin dos

definicion. E por ta un obheto pa recorda algo cu ta keda existi, pero e por ta tambe loka e resta di e cultura di antaño, arte of ciencia.

Un monumento, mira for di e punto di bista pa conservacion, mester ta mas cu 50 aña bieu.

Na Aruba kisas ainda e nificacion di monumento no ta hancra suficiente den curason di hende.

Un gran cantidad di monumento ainda no ta conoci pa e mayoria di e poblacion. Tambe tin edificionan monumental di gran balor cu mester di protec-

cion. Te poco tempo pasa ainda, nan a basha algun cas y edificio bieu abou.

Pa medio di un serie di stampia dedica na un of mas monumento, lo por pasa e conocimiento di e tesoronan cultural, scondi den e monumentonan, na cada un di nos.



E edificio antiguo di Aruba Bank

E cas di cunucu urbano (construi probablemente na 1860) a keda cambia di sitio for di Caya Betico Croes pa un luga nobo na Weststraat. Esaki tabata un proyecto unico, ya cu e edificio aki tabata na punto pa bash'e abou. Tabatin un caso sumario y tambe un caso hudicial y te hasta caso di apelacion riba e asunto aki. Pa salba e edificio aki cu su cuatro bentana di zolder cu bo no ta mira tur caminda mas, den Deshecho di Monumento e idea a nace pa desarma e edificio pa deshecho bolbe construi esaki na un otro sitio. No tabata facil pa scoge un alocacion nobo. Esaki tabata depende principalmente di e gastonan involvi.

Na final a scoge pa un sitio den ciudad, como cu e opinion a reina cu e edificio mester keda den e contexto urbano. Tambe a busca un pida tereno di cua e grandura ta cuadra cu e exigencia existente pa por pone e edificio mas atras ainda di e rooilijn. Nan a desarma e bentananan di zolder, porta- y bentananan completamente. A klem e murayanan cu plachi di metal y a transporta nan na e sitio nobo pa despues pone nan riba un fundeshi nobo. E proyecto tabata un éxito grandi, cu a haya hopi atencion tanto na Aruba como internacionalmente.

Durante e renobacion a descubri cu den curso di añanan a haci diferente cambio na e cas. Originalmente e tabatin un fogon, pero como cu no tabata dispone di e midinan exacto, no por a pone of reconstrui esaki mas na su luga. Den e edificio aki tabata situa e Museo Numismatico durante un periodo.

Cas di famia Wild

E cas aki ta situa na Schelpstraat 12. E ta un cas di comerciante, probablemente construi den e di dos mita di siglo 19. E tabata un cas di cunucu masha modesto. E tempo ya su grandura tabata dos biaha mas chikito. Paardenbaai tabata keda hopi cerca di dje. Algun biaha e doño a haci expansion na e cas. Por ehempel, a expande e parti nucleo di e cas den direccion oost. Pa e motibo aki, a bin un di dos zolder acerca. Fundacion Monumentenfonds a cumptra e cas y na 2006 el a wordo reconstrui y modernisa. Hunto cu esaki a pone un capa nobo grandi cu cuatro bentana di zolder. Te ainda por mira cu tin un parti chikito di e piedranan di e muraya di hardin.



Quinta del Carmen

E edificio aki ta situa na Bubali 119. Realmente e cas aki ta netamente un cas tradicional di cunucu. E ta consisti di un sala cu hadrey di zuid y un cushina cu fogon.

E midinan grandi, cu stupi mahestuoso, e terras cu ta pasa rond, e leishinan profila den forma di boog cu ta duna claridad na e banda ariba di e bentana y portanan y e leishinan di fachada gepleister ta duna estilo di un villa mahestuoso.

Quinta del Carmen ta data for di 1918. E comerciante Adriaan Lacle a dun'e e nomber di un di su yunan.

E cas aki tin un zolder cu algun bentana den e dak. Diferente famia a biba den e cas aki. Durante un tempo te hasta el a sirbi como cas di personal y como hospital di e ex Compania Arend Petroleum na Eagle. Actualmente tin un negoshi di restaurant eyden.



Ex Hotel Colombia

E edificio ta construi na 1918 na e skina di Zoutmanstraat 13-15 y Oranjestad. E detayenan tin caracteristicas di estilo neoclasicismo. Probablemente e funcion original di e edificio lo tabata en conexion cu e gran cantidad di migrantenan laboral Arubiano entre 1916 y 1920. Na e edificio aki teatro aire liber a haci inicio na 1919. Ademas e edificio a fungi como consulado di Venezuela y vivienda di e consul.

Despues e edificio a keda conoci como hotel Colombia, cu ta un di e prome of si no ta e prome hotel explota comercialmente na Aruba. Eyden tabatin tambe un negoshi di imprenta. Na 1986 pais Aruba a cumptra e edificio. E tabata den un mal estado. Na 1997 a cuminsa cu e restauracion. E edificio aki y esun di stadhuis (edificio di Eloy Arends), ta conecta na otro pa medio di un construcion completamente nobo. Actualmente henter e complejo aki ta sirbi como oficina di Censo y Registro Civil.



E watertoren na San Nicolas

E watertoren aki ta situa na Bernhardstraat. Tabatin un scarsedad di awa na comienso di siglo binti. Esaki a conduci na establecimiento di e Landswatervoorzieningsdienst (LWV) na Corsou na 1928. E compania aki mester a percura pa tin suficiente awa den stock na Aruba, Boneiro y Corsou. LWV a dicidi pa coba algun pos na unda e habitantenan por a bin busca awa di pos gratis. Na 1933 a keda construi na Balashi un instalacion pa destila awa di lama. Asina Aruba a haya su red di tuberia di awa instala. Durante e oranan druk a resulta cu e presion di awa ta mucho abou. P'esey a dicidi di construi dos watertoren. A inaugura e watertoren na San Nicolas dia 14 di augustus 1939 y esun di Oranjestad dia 4 di november 1939. A restaura esun di San Nicolas y dia 8 di maart 2013 el a wordo entrega na e fundacion Stichting Monumentenfonds Aruba. E watertoren di San Nicolas lo sirbi como museo y espacio di exposicion pa e companianan di utilidad.



Stadhuis (oficina di Censo y Registro Civil)

E bonita y historico stadhuis di Aruba ta ubica den e villa color berde Caribense cu ta keda den Wilhelminastraat. E edificio ta conoci bou di e nomber di Edificio Eloy Arends. E proyecto aki ta diseña pa e arkitecto Arubiano Merdardo Dada Picus. Durante su compromiso cu Maria Monica Lacle na 1922, J.E.M. Arends a duna ordo pa construcion di e cas Arends aki. Na 1925, despues cu nan a bolbe di nan biahe di luna di miel, Eloy Arends y Maria Monica a bay biba den e cas. Despues cu Eloy Arends a fayece na 1960, ainda e cas keda algun aña propiedad di e famia pa mas despues Gobierno di Aruba a dicidi di cumptra e cas. E cas tabata den un mal estado y na 1997 Monumentenfonds y Stichting monumentenfonds a cuminsa cu e restauracion. Actualmente e cas aki ta sirbi como stadhuis.



Fort Zoutman y Willem III Toren

A construi e complejo di Fort Zoutman y Willem III Toren den diferente fase cu tabata sirbi como forti, faro di antes y toren den ciudad. A restaura tur dos edificio entre 1974 y 1980. Despues Museo Historico a bay eyden.

Na momento cu a construi e faro aki, Gezaghhebb J.H. Ferguson a haci un peticion na Gobernador di Corsou pa laga pone un holoshi grandi (stadsklok) eyden. Sinembargo, a keda dicidi di construi un faro na unda na e mesun momento por colga un klok pa bati cada ora (uulok). E toren a haya e nomber di Rey di Hulanda di e tempo ey, Willem III.

Na 1937 e toren a haya su forma actual bou mando di gezaghhebb I. Wagemaker. Ta bale la pena pa menciona cu e complejo aki ta e edificio di mas bieu di Aruba y cu el a sirbi como forti, faro, holoshi publico, edificio di Gobierno, Warda di Polis, prizon, oficina di impuesto, sala di corte, biblioteca, postkantoor, museo y stadhuis.

Te ainda tur siman ta tuma luga na e sitio aki e tan famoso Bon Bini Festival, na unda bo por experencia un chispa agradable di e cultura y musica Arubiano. Ora nos mira tur e funcionnan cu e monumento aki tabatin den curso di siglonan, ta claro cu mester considera esey como simbolo cu ta vigila e conservacion di tur monumento y cultura di Aruba.



E cas di famia Henriquez

E cas aki ta situa na Schelpstraat 36/38. E aña di construcion probablemente ta 1875.

E cas aki na cierto momento tabata masha deteriora y tambe el a sufrí algun daño di candela. Dia 30 di november 2000 Oficina di Monumento (Monumentenbureau) a cuminsa cu trabou di renobacion na e cas aki y na mei 2002 e proyecto di renobacion a keda completamente cla.

Durante e renobacion nan a haya bou di vloer un piedra di mula. E piedra aki awor ta na Museo Arkeologico pa estudio. Actualmente e Oficina di Monumento (Monumentenbureau) ta ubica den e cas monumental aki.